

## D's LOOSHOLZ-RICHTA [Heimelige Zeiten Nr. 10, 1997]

D's Loosholz-Richta ischt an Arbat gsi, wa ma am Bärgh scho lang nümma machat. Früahr ischt äns ab'r im Spaatherbscht und da Winter an wichtagi Arbat gsi, wa eine od'r zwee Männer uus am Huushalt d'r mid z'tua gha händ. Ma hed d's Loosholz muassa richta und de d'r nah hei tua. Ma hed dua halt all's no muassa va Hand macha, va Motorsäga und va Free-scha hed ma dua no nüüd g'wisst. Au zum d's Holz nahitua ischt va Traktora und Lastwäga no nüüd umha gsi. Das hed all's muassa va Hand uuf Handschlitta od'r, wenn'd's de kä Schnee meh gha hed, uuf ama Zweiredlerchara heig'füahrd wärda. Speeter ischt dua au ätta amaal d' Holz mid ama Ross-, Ochsa- oder au Rinderlifuahrwärch heig'füahrd woorda.

Amma Sunntig dan Oktob'r ischt de na'h d'r Mäss vam Weib'l verrüaft woorda, as chünnen de a däm Sunntig, das ischt de ätta acht od'r vierzäha Tag speeter gsi, d'Loosholznummera zoga wärda. Und de hed ma de chunna Endi Oktober, afangsch November im alta Schualhuus, wa dött g'standa ischt, wa hüüt d's Cafi Kainer steihd, uus ara Schachtla od'r uus a'ma Trücki uussa d'Loosholznummera ziah.

Bi ra Nummera sind de albi zwee Parta beteilagat gsi, de as ischt de vorhar albi uusg'machet gsi, wär mid wäm d's Loosholz zäma hed. Dia Bömm, wa de ihna g'höörd händ, ä sind im Wald mid dera Nummera ag'schriiba gsi.

### Das ischt au an Glückssach gsi.

Troffa hed's de eim aso um di drei Kubikmeter Holz, Bauholz und Brennholz. Da ischt de zwüschat den Loos scho ätta amaal Und'rschied gsi im Quantum. D'r Waldvogt hed im Wald muassa d'Bömm noch asa stendaga i Bruthöhi mässa und d'Lenga abschetza. Dass da Und'r-schied gä hed, ischt verstendli.

Ab'r au ir Qualitet vam Holz sind au ätta Und'rschied gsi. D'r Eina hed schöö frisch's Holz ub'rcho, discha scho rots und an andara hed gar noch an halbfuula Brocha d'runder gha. D'r eina hed an aschtaga, ruuha Fotza, discha ab'r fascht aschfrei's Bau- und Nutzholz verwüschet. Das ischt de halt aso an Glückssach gsi, aber d'Schuld gä hed ma da niemät chunna. Und ub'r d'Jahr hed schi dia Sach au uusgliicha. Jeda hed amaal schöös und an jeda au ätta amaal schlächters Loosholz zoga. As hed wäga däm au nia ätta Differenza oder Schwierigkeita gä.

### An g'fährlagi Sach is gsi, ab'r meistens guat abganga.

Dia Holzrichter, wa nid fuatara muassa händ, ä sind da Winter amma Moorgat, wenn'd's no Nacht gsi ischt, scho uuf da Wäg, vor allem, wenn'd'sch uuf d'Sücka i händ muassa ga Loosholz richta, de sicher. Bis'sch uber da Kulm i cho sind, is de scho g'höörig Tag gsi. Uusg'rüscht sind'sch de mid ara groos-